

四庫全書

史部

欽定四庫全書

史部

欽定續通志卷一百九十四

一至四

通政使司副使臣施朝幹覆勘

總校官原任侍講臣王燕緒

欽定四庫全書

欽定續通志卷一百九十一

宗室傳

遼一

肅祖諸子

懿祖諸子

安祖諸子

揚珠

托雲

碩格

達魯

希達

善補

華格

鴻果

瑪魯

和囉木

薩噶

舒嚕

幹

羅

卜科

資忠

達魯

哈瑯

仙童

穆濟

德祖諸子

埒克

巴里岱
哈里

達喇和卓

伊德寶

安圖

蘇諾

特烈

博迪

布庫

華善

章努

庶成

庶歲

肅祖四子長學順次懿祖次哈喇次轄哩皆昭烈皇后

生

按原史太祖以上諸子不為立傳今依皇子表增輯
冠以標題以著二院三父房之始其子孫散見于列

傳著酌為增

輯附于其後

學順字雅遜為德呼勒部額爾奇木分五錫林為七六

昭為十一

按遼國語解五錫林即五院以五錫林為一院也昭百數也遼有六百家奚後為院又接

營衛志天贊元年太祖以德呼勒部強大難制折五其錫林為五院六昭為六院則又似太祖時始分也

後為五院額爾奇木房

哈喇字古昆洽禮字達年皆為錫里其後為六院郎君

房

懿祖四子長蘇拉次塔拉次玄祖次尼古察皆莊敬

皇后生

蘇拉為錫林早卒

塔拉字赫德九任額爾奇木其後為六院額爾奇木房
尼古察字頁卜肯為錫林善射年幾冠墮馬卒其後為
六院錫林房

玄祖四子長瑪魯次揚珠次寶魯次德祖皆簡獻皇后
生

瑪魯為錫林早卒

揚珠字達年身長八尺多力能裂麕皮語音如鐘三為
德呼勒部額爾奇木年四十五薨重熙中追封蜀國王

子二果勒濟摩綽其後為孟父房

托雲字托紐父摩綽嘗為額爾奇木托雲性端直會同
中領九錫林部政濟寬猛世宗即位為特哩袞天祿三
年兼政事令封漆水郡王及穆宗立以匡贊功嘗許以
本部大王後將葬世宗托雲懇言於帝曰臣蒙先帝厚
恩未能報及大葬臣請陪位帝由是不悅寢其議薨
碩格字穆克迪橫帳孟父之後幼為太祖所養既冠為
右皮室詳袞從伐渤海戰有功天顯七年授三河烏爾

古部都詳袞平易近民民安之以故久其任會同間為特哩袞時晉主石重貴渝盟帝親征晉將杜重威擁衆拒濬沱月餘帝由他渡濟碩格與趙延壽據中渡橋重威兵却遂降是歲入汴世宗即位碩格奉太宗喪歸上京佐皇太后出師坐是免官卒

達魯字陽隱孟父楚國王之後性質直多膂力察割作亂達魯聞之入見壽安王慷慨言曰願得精兵數百破賊黨王嘉其忠穆宗即位為北院宣徽使帝以飛狐道

狹詔達魯廣之明年將兵援河東至太原與漢王會于
高平擊周軍敗之仍降其衆忻代二州叛將兵討之會
塔喇至敗周師於忻口師還卒

希達孟父楚國王之後便弓馬勇於攻戰景宗時多任
以軍事統和四年為右皮室詳袞時宋將楊繼業陷山
西郡縣希達從樞密使色珍討之凡戰必以身先矢無
虛發繼業敗于朔州之南匿深林中希達望袍影而射
繼業墮馬先是軍令湏生擒繼業希達以故不能為功

後太后南伐屢有戰績以病卒

善補字瑤昇孟父楚國王之後純謹有才智景宗即位授千牛衛大將軍遷大同軍節度使及伐宋韓匡嗣與耶律刷將兵由東路進善補以南京統軍使由西路進善補聞匡嗣失利歛兵還乾亨末與宋軍戰于滿城為伏兵所圍色珍救之獲免以失備大杖決之統和初為特哩袞會宋來侵善補為都元帥逆之不敢戰故嶺西州郡多陷罷特哩袞以其叔安圖

按此安圖乃揭珠魯孫事詳列傳非德帝

子安圖也
原文誤

有匡輔世宗功帝愍之徵善補為南府宰相
遷南院大王會再舉伐宋欲攻魏府召衆集議將士以
魏城無備皆言可攻善補曰攻固易然城大巨量若克
其城士卒貪俘掠勢必不可遏且傍多巨鎮各出援兵
內有重敵何以當之帝乃止善補性懦守靜凡征討憚
攻戰急還以故戰多不利年七十四卒

華格字弘隱孟父楚國王之後善騎射乾亨初為北院
林牙統和四年南侵宋華格擒諜者知敵由海路來襲

即先據平州要地事平拜上京留守遷北院大王十六
年復侵宋為先鋒破敵于遂城以功遷南院大王尋改
北院樞密使開泰元年伐準布俘獲甚多帝嘉之封幽
王後邊吏奏自華格還闕糧乏馬弱勢不可守帝復遣
華格經略西境華格與邊將深入聞蕃部逆命居伊濟
水華格徐以兵進敵望風奔潰獲羊馬及輜重路由白
拔烈遇阿爾斯蘭回鶻掠之都監紐幹哩繼至謂華格
曰君誤矣此部實効順者華格悉還所俘諸蕃由此不

附帝使案之削王爵以侍中遙領大同軍節度使卒弟

鴻果

鴻果字和多沁統和間累遷順義軍節度使入為北面
林牙太平元年加同政事門下平章事出為彰國軍節
度使兼山北道兵馬都部署徙武定軍節度使拜特哩
袞六年討準布有功聖宗嘗刺臂血與鴻果盟為友禮
遇尤異拜南府宰相改上京留守重熙六年遷南院大
王御製誥辭以寵之十三年加裕悅帝憫其勞復授武

定軍節度使卒訃聞帝哭曰惜哉善人喪至親臨奠焉
瑪嚕字揚隱孟父楚國王之後性寬和善諧諛親朋
會遇一坐盡傾怙于榮利與鴻果為刺血友鴻果為特
哩袞薦補為宿直官重熙初遷旗鼓伊喇詳袞為人畏
慎容物或有面相陵折者恬然若弗聞不臧否世務以
故帝益親狎三年遷崇德宮使為特哩袞御製誥辭以
褒之拜北院宣徽使寵遇過宰相帝常以兄呼之改遷
要重節度使卒子努克特終南京宣徽使

和囉木薩噶字烏庫哩孟父房之後重熙末補祗候郎
君清寧初加安州團練使大康中厯懷德軍節度使奚
六部圖哩太尉詔與樞密官措畫東北邊事改左護衛
大保侍帝言多率易察無他賜以故帝優貸之八年知
西北路招討使事時邊部尼格爾等來侵和囉木薩噶
誘北準布酋豪默古斯攻之俘獲甚衆以功加左僕射
復討尼覲格爾等誤擊默古斯北準布由是叛命遣都
監張九討之不克二室韋與六院部特默羣牧宮分等

軍俱陷于敵坐不以實聞削官壽隆間累遷特哩袞兼
侍中賜保節功臣道宗崩與宰相耶律儼總山陵事乾

統中為南院大王

據天祚紀增

致仕卒

舒實魯字蘇呼駢胥多力賢而有智初約尼氏可汗歲
貢於突厥至寔魯為裕悅免焉始教民種樹桑麻年五
十七為子華格所弑重熙中追封隋國王其後為仲父
房孫幹

幹字達年南院額爾奇木奎蘇子少有器識人以公輔

期之太祖時雖未官常任以事太宗即位為特哩袞天
顯末常援河東幹為先鋒敗張敬達軍於太原北會同
中遷北院大王及伐晉復為先鋒與梁漢璋戰於瀛州
敗之太宗崩于欒城幹與厚定策立世宗令諸將曰有
不從者以軍法從事諸將皆曰諾世宗即位賜宮戶五
十拜裕悅卒

羅卜科字信寧太祖從姪初太祖制契丹國字羅卜科
以贊成功授林牙監修國史後率偏師為西南邊大詳

袞從伐党項有功會河東節度使石敬瑭為其主所討遣人求援羅卜科導送于朝如其請帝親率師往援羅卜科從擊唐將張敬達于太原北敗之會同初從討党項俘獲最諸將師還天冊中拜裕悅六年為北院大王卒子賢適有傳

耶律資忠字烏延系出仲父房兄果羅善屬文聖宗重之時妻弟之妻阿古與奴通將奔女真國果羅追及奴殺之阿古自經阿古母有寵于太后事聞太后怒將殺

之帝度不能救遣人訣別問以後事果囉謝曰陛下憫
臣無辜死且不朽既死人多寃之資忠博學工辭章年
四十未仕聖宗知其賢召補宿衛數問以古今治亂資
忠對無隱開泰中授中丞眷遇日隆初高麗內屬取女
真六部地以賜至是貢獻不時至詔資忠往問故高麗
無歸地意由是權貴數短之出為上京副留守四年按
麗傳資忠再使高麗在再使高麗留弗遣資忠每懷君
開泰三年與本傳異親輒有著述號西亭集帝與羣臣宴時一記憶曰資忠

亦有此樂乎九年高麗上表謝罪始送資忠還帝郊迎
同載以歸命大臣宴勞留禁中數日謂曰朕將屈卿為
樞密何如資忠對曰臣不才不敢奉詔乃以為林牙特
哩衮事初資忠在高麗弟昭為著帳郎君坐罪沒家產
至是乃復橫帳且還舊產詔以外戚女妻之是時樞密
使蕭和卓少師蕭巴噶有寵資忠不肯俛附詆之帝怒
奪官數歲出知來遠城事歷保安昭德二軍節度使聖
宗崩表請會葬既至伏梓宮大慟氣絕而蘇興宗命醫

治疾久之言國舅侍中無憂國心陛下不當復用唐景福舊號於是用事者惡之遣歸鎮卒弟昭有傳

達魯字伊聶仲父房之後習兵事為左皮室詳衮統和二十八年伐高麗達魯率本部軍與博諾等擒康肇李玄蘊于銅州帝壯之曰以卿英才為國戮力真吾家千里駒也明年為北院大王出為烏爾固迪里部都詳衮卒

哈瑠字索紐仲父隋國王之後有明識篤行義舉止嚴

重工為詩統和間召攝御院通進開泰三年稍遷烏爾
固迪里部都監俄知詳袞事迪里部叛將宮分軍從樞
密使世良討平之加千牛衛大將軍重熙元年累遷至
同知上京留守改奚六部圖哩太尉為樞密使蕭嘉哩
所忌帝欲召用哈瑠嘉哩言目病不能視議遂寢四年
召為北面林牙帝曰朕早欲用卿聞有疾故待之至今
哈瑠對曰臣昔有目疾才數月耳然亦不至于昏第臣
驚拙不能事權貴是以不獲早覩天顏非陛下聖察則

愚臣豈有今日耶詔進述懷詩帝嘉歎方將大用卒
仙童仲父房之後重熙初為宿直官累遷特里衮都監
以寬厚稱富珠哩叛仙童為五國節度使率師討之擒
其帥托多羅又擊威叛衆降之改彰國軍節度使拜北
院大王清寧二年知黃龍府事遷侍衛親軍馬步軍都
指揮歷忠順武定二軍節度使致仕封蔣國公咸雍初
徙封許國卒

穆濟字留隱仲父隋國王之後初以皇族入侍景宗即

位為林牙以幹給稱保寧間遷樞密副使宋攻河東南
府宰相刷為都統將兵往援穆濟監其軍及白馬嶺之
敗僅以身免宋乘銳攻燕將奚兵翊休格擊敗之以功
釋前過十一年從都統韓匡嗣伐宋戰于滿城為宋將
所紿諸軍奔潰獨穆濟部伍不亂徐整旗鼓而歸璽書
褒諭改南海軍節度使乾亨二年拜樞密副使統和初
為東京留守宋將曹彬米信等侵邊穆濟引兵至南京
先繕守禦備及車駕臨幸穆濟與休格逆戰于涿之東

克之遷開遠軍節度使故事州民歲輸稅斗粟折錢五
穆濟表請折錢六部民便之統和末卒

德祖六子長太祖次埒克次達喇次伊德寔次安圖皆
宣簡皇后生次蘇不詳其母氏後並為季父房

埒克字綏蘭性愚險太祖即位為特哩袞討聶哱部破
之因與弟達喇安圖等謀亂事覺按問具伏太祖令誓
而捨之曰汝謀此事不過欲富貴耳出為德呼勒部額
爾奇木從太祖親征統本部兵攻下平州復謀為亂誘

羣弟據西山以阻歸路太祖聞而避之攻赤水城埒克
詐降復使神速焚明王樓大掠而去至布扎爾哈爾吉
二河與追兵戰衆潰及雅里河孟古部人邀擊之埒克
輕騎遁去至榆河先鋒達魯生擒之太祖不忍加刑杖
而釋之神冊二年自幽州南奔為人所殺按資治通鑑云埒克達喇
率其衆奔晉晉王厚遇之奏為假子仕至刺史後復奔
梁同光元年唐滅梁與趙嚴等族誅于市本傳失載附
錄于此子賽保巴哩岱

巴哩岱字海蘭太宗即位以親愛見任會同七年討石

重貴巴哩岱進圍德州下之擒刺史師居璠等二十七人九年再舉兵次潯沱河降杜重威戰功居多太宗入汴以功授安國軍節度使總領河北道事師還州郡往往叛以應劉知遠巴哩岱不能守而歸世宗即位遷中京留守卒子哈里

哈里

此與前哈里非一人

字留隱察克之亂其母達魯與焉遣人

召哈里哈里拒之亂平達魯以子故獲免哈里儉素不喜聲利以射獵自娛雖居間人敬之若貴官保寧初拜

彰國軍節度使遷特哩袞秩滿稱疾不仕久之復為南院大王及曹彬米信等來侵哈里有却敵功賜資忠保義匡國功臣帝屢親征哈里有南院十餘年鎮以寬靜戶口增給時議重之封漆水郡王遷上京留守薨詔以家資給葬具

達喇字伊勒都堪天顯元年為中臺省左大相性敏給太祖曰達喇之智卒然圖功吾所不及回鶻使至無能通其語者太祖曰達喇聰敏可使迓之相從二旬能習

其言語書契因制契丹小字數少而該貫後與兄埒克
謀反埒克遁達喇與安圖降太祖杖而釋之孫和卓
和卓字諾袞幼不好弄臨事明敏善談論初以近族入
侍每從征伐有功保寧初加右龍虎衛上將軍以宋師
屢梗南邊拜涿州刺史西南兵馬都監招安巡檢等使
賜推忠奉國功臣和卓久任邊防務鎮靜不妄生事以
邀近功鄰壤敬畏屬部又安宋數遣人結歡冀達和意
和卓表聞其事帝許議和安邊懷敵多有力焉拜左金

吾衛上將軍秩滿還攝鎮國軍節度使卒和卓智而有
文曉暢戎政鎮范陽時嘗領數騎徑詣雄州北門與郡
將立馬陳兩國利害及周師侵邊本末辭氣慷慨左右
壯之自是邊境數年無事識者以謂和卓一言賢於數
十萬兵

伊德寔字愛新與埒克作亂兵敗太祖赦之後與埒克
遁至榆河自刺不死被擒釋之太祖崩遺詔守太師政
事令輔東丹王淳欽皇后遣司徒華沙殺于路重熙間

追封許國王子四人瑠格帕克哈噶哩寔奇具見逆臣傳

安圖字猥隱神冊元年討平雲州二年為特哩袞天贊元年征渤海破老相兵三萬餘人安邊鄭頡定理三府叛平之太宗即位有定策功會同中伐晉率兵先出雁門下忻代世宗初立以兵往應及魯呼戰于泰德泉敗之封東丹國賜號明王初安圖與兄埒克謀亂其妻粘睦姑告變太祖誓而免之復叛被擒杖而釋之及其子

察克以弑逆被誅穆宗赦其罪放歸田里

蘇字伊勒都堪性柔順事上忠謹言無隱情太祖尤愛之神冊五年為特哩袞六年為南府宰相以賄聞民頗怨焉滄州節度使劉守文求救太祖命蘇往解滄州圍埒克詐降往來其間既平蘇力為多天贊三年與迪里略地西南天顯初從征渤海師還薨太祖二十功臣蘇其一也孫諾袞

諾袞字延寧統和四年宋楊繼業來侵諾袞為黃皮室

紇都監擊敗之盡復所陷城邑軍還加諸衛小將軍及
伐宋有功遷黃皮室詳袞六年再舉將先鋒軍敗宋游
兵于定州為東京統軍使加金紫崇祿大夫從奚王和
碩魯伐烏舍以戰失利削金紫崇祿階十九年拜南府
宰相二十一年復伐宋擒其將王繼忠于望都俘殺甚
衆以功加同政事門下平章事二十六年為遼興軍節
度使尋復為南府宰相開泰初加尚父卒孫博迪
博迪字薩巴重熙初補牌印郎君清寧初稍遷知易州

去官部民請留許之咸雍八年改彰國軍節度使上獵
達里庫山博迪謁于行宮帝問邊事對曰自應州南境
至天池皆我耕牧之地清寧間邊將不謹為宋所侵烽
堠內移似非所宜道宗然之拜北面林牙後遣人使宋
得其侵地命博迪往定疆界還拜南院宣徽使大康四
年遷忠順軍節度使尋為南院大王改同知南京留守
事召拜南府宰相賜貞良功臣封吳國公為北院樞密
使廡謹奉公知無不為大安中致仕卒子哈瑪爾北院

樞密副使

布庫字提隱太祖弟蘇四世孫以武勇稱統和初為涿州刺史從伐高麗有功開泰末為上京內客省副使太平二年城鴨綠江布庫守之在鎮有治績五年改廣德軍節度使尋遷東京統軍使蒞政嚴肅諸部懾服九年大延琳叛以書結保州夏行美執其人送布庫布庫入據保州延琳氣沮沮以功拜特哩袞十一年為子鐵驪所弑

華善字特默系出季父房重熙初補祗候郎君時常薦
于親親凡三父之後皆序父兄行第於華善尤狎愛然
每侍宴飲雖詼諧未嘗有一言之過由是帝益重之歷
積慶永興宮使累遷至同知南院宣徽使事南面林牙
十六年出為懷化軍節度使俄召為御史大夫二十三
年因大冊加天平軍節度使檢校太師徙中京路案問
使卒華善雅有美行數以財恤親友人皆愛重然嗜酒
不事事晚年沈湎尤甚人稱為酒仙云

特默季父房之後重熙間為北剋累遷六部圖嚕太尉
大安四年為倒捷嶺節度使頃之為禁軍都監是冬討
默古斯斬首二千餘級十年復討之既捷授南院宣徽
使壽隆元年為北院大王四年知黃龍府事卒

章努字塔瑪雅季父房之後父扎拉養高不仕章努明
敏善談論大安中補牌印郎君乾統元年累遷右中丞
兼領牌印宿直事六年以直宿不謹降知內客省事天
慶四年授東北路統軍副使五年改同知咸州路兵馬

事及天祚伐金蕭呼敦為先鋒都統章努為都監渡鴨
子河章努與魏國王淳妻兄蕭迪里及其甥蕭雅里等
謀立淳誘將卒三百餘人亡歸既而天祚為金所敗章
努乃遣迪里雅里以廢立事馳報淳淳猶豫未決會行
宮使者伊蘇持天祚御札至備言章努叛命淳對使者
號哭即斬迪里雅里首以獻天祚章努見淳不從誘草
寇數百攻掠上京取府庫財物至相州率僚屬告太祖
廟西至慶州復祀諸廟仍述所以舉兵之意移檄州縣

諸陵官僚士卒稍稍屬心時饒州渤海乃侯檠等相繼
來應衆至數萬趨廣平淀其黨耶律寧古等暴橫不法
劫掠婦女財畜章努度不能制內懷悔恨又攻上京不
克北走金將阿固濟率兵追敗之殺其將耶律穆爾濟
擒貴族二百餘人其妻子配後繡院或散諸近侍為婢
餘得脫者皆遁去章努詐為使者欲奔金為邏者所獲
縛送行在伏誅

庶成字喜隱季父房之後父烏津檢校太師庶成幼好

學書過目不忘善遼漢文字於詩尤工重熙初補牌印
郎君累遷樞密直學士與蕭罕嘉努各進四時逸樂賦
帝嗟賞初契丹醫人鮮知切脉審藥帝命庶成譯方脉
書行之自是人皆通習雖諸部族亦知醫事時入禁中
參決疑義偕林牙蕭韓家努等撰實錄及禮書與樞密
副使蕭德按蕭德傳云遷樞密副使詔與耶律庶成同
修律令當即此事也原文作耶律德誤今改
正修定法令帝詔庶成曰方今法令輕重不倫法令者
為政所先人命所繫不可不慎卿其審度輕重從宜修

定庶成參酌古今刊正訛謬成書以進帝覽而善之庶成方進用為妻呼圖克所誣以罪奪官絀為庶耶律使吐蕃凡十二年清寧間始歸帝知其誣詔復本族仍遷所奪官卒第庶箴

庶箴字辰甫善屬文重熙中為本族將軍咸雍元年同知東京留守事俄徙烏衍突厥部節度使九年知薊州事明年遷都林牙上表乞廣本國姓氏曰我朝創業以來法制修明惟姓氏止分為二耶律與蕭而已始太祖

制契丹大字取諸部鄉里之名續作一篇著于卷末臣
請推廣之使諸部各立姓氏庶男女婚媾有合典禮帝
以舊制不可遽釐不聽大康二年出耶律伊蘇為中京
留守庶箴與耶律孟簡表賀頃之伊蘇復為樞密使事
專權恣雋庶箴私見伊蘇泣曰前抗表非庶箴之願也
伊蘇信其言乃得自安聞者鄙之八年致仕卒子富魯
富魯字努展幼聰悟好學甫七歲能誦契丹大字習漢
文未十年博通經籍重熙中舉進士第主文以國制無

契丹試進士之條聞于帝以庶箴擅令子就科目鞭之
尋命富魯為牌印郎君應詔賦詩立成以進帝嘉賞顧
左右曰文才如此必不能武事富魯奏曰臣自蒙義方
兼習騎射在流輩中亦可周旋帝未之信會從獵三矢
中三兔帝奇之轉通進是時父庶箴嘗寄戒諭詩富魯
答以賦衆稱其典雅寵遇漸隆清寧初卒

欽定續通志卷一百九十一

欽定四庫全書

欽定續通志卷一百九十二

宗室傳

遼二

太祖諸子

義宗倍

隆先
道隱

章肅皇帝魯呼

喜隱

雅勒呼

太宗諸子

雅斯哈

天德

迪里

必舒

世宗諸子

扎木

景宗諸子

隆慶

隆祐

聖宗諸子

布古德

博諾

興宗諸子

和囉噶

淳

阿林

道宗一子

順宗濬

天祚諸子

晉王額魯溫 雅里

太祖四子淳欽皇后生倍次太宗次魯呼宮人蕭氏生

雅勒呼

按原史當無標題
今依皇子表補

義宗倍小字托雲聰敏好學外寬內摯神冊元年立為
皇太子時太祖問侍臣曰受命之君當事天敬神有大
功德者朕欲祀之何先皆以佛對倍曰孔子大聖萬世
所尊宜先太祖大悅即建孔子廟詔皇太子春秋釋奠
嘗從征烏爾古党項為先鋒都統及經畧燕地太祖西
征留守京師因陳取渤海計天顯元年從征拔扶餘城
帝欲括戶口諫曰今始得地而料民民必不安若乘破
竹之勢徑造輝罕城克之必矣太祖從之倍與大元帥

德光為前鋒夜圍城大譴譟降復叛太祖破之改其國
曰東丹名其城曰天福以倍為人皇王主之仍賜天子
冠服建元甘露稱制置左右大次四相及百官一用漢
法歲貢布十萬端馬千匹諭之曰此地瀕海非可久居
留汝撫治以見朕愛民之心駕將還倍作歌以獻陞辭
號泣而出遂如儀坤州未幾諸部多叛大元帥討平之
太祖訃至奔赴山陵知皇太后意欲立德光乃與羣臣
請於太后而讓位焉太宗既立見疑以東平為南京徙

倍居之盡遷其民又置衛士陰伺動靜倍既歸國起書樓於西宮作樂由園詩唐明宗聞之遣人跨海持書密召倍倍因政海上使再至倍謂左右曰我以天下讓主上今反見疑不如適他國以成吳太伯之名立木海上刻詩曰小山壓大山大山全無力羞見故鄉人從此投外國攜高美人載書浮海而去唐以天子儀衛迎倍至汴明宗以莊宗後宮

原作莊宗后考五代會要夏氏實莊宗昭容封魏國夫人非后也契

丹國志作後

宮據據改

夏氏妻之賜姓東丹名之曰慕華改瑞州

為懷化軍拜懷化軍節度使瑞慎等州觀察使復賜姓
李名贊華移鎮滑州遙領虔州節度使倍雖在異國常
思其親問安之使不絕後從珂弑其君自立倍密報太
宗請討之及太宗立石敬瑭為晉主加兵于洛從珂欲
自焚召倍與俱倍不從遣壯士李彥紳害之時年三十
八敬瑭入洛喪服臨哭以王禮權厝後太宗改葬于醫
巫閭山謚曰文武元皇王世宗即位謚讓國皇帝陵曰
顯陵統和中更謚文獻重熙二十年增謚文獻欽義皇

帝廟號義宗及諡二后曰端順曰柔貞

按柔貞后實生世宗天祚初加

尊皇太后察

克反同造款倍初市書至萬卷藏于醫巫閭絕頂之望

海堂通陰陽知音律精醫藥砭熅之術工遘漢文章善灼然性刻急好殺婢妾微過常加判均夏氏懼而求削髮為尼五子長世宗次隆科舒隆先道隱各有傳

平王隆先字團隱母大氏景宗即位封平王未幾兼政事令留守東京薄賦稅省刑獄恤鰥寡數薦賢能之士後與統軍耶律實魯同討高麗有功還薨葬醫巫閭山

之道隱谷平王博學能詩有開苑集行于世保寧之季
其子辰格與渤海官屬謀殺其父舉兵作亂帝命報裂
于市

晉王道隱字留隱母高氏道隱生於唐人皇王遇害時
年尚幼洛陽僧匿之因名道隱太宗滅唐還京賜外羅
山地居焉性沉靜有文武才時人稱之景宗即位封蜀
王為上京留守乾亨元年遷守南京號令嚴肅民獲安
業徙封荆王統和初薨追封晉王

章肅皇帝魯呼一名鴻觀字奚隱少勇悍多力而性殘酷太祖嘗觀諸子腹魯呼縮項臥內曰是必在諸子下又嘗大寒命三子採薪太宗不擇而取最先至人皇王取其乾者束而歸後至魯呼取少而棄多太祖曰長巧而次成少不及矣而母篤愛魯呼天顯五年遣徇地代北攻寰州多俘而還遂立為皇太弟

按太宗紀冊為壽昌皇太子與此互異

兼天下兵馬大元帥太宗親征留守京師世宗即位鎮陽太后遣魯呼將兵擊之至泰德泉為安圖瑠格所敗

耶律烏哲入諫太后魯呼在側作色曰我在烏雲安得
立烏哲曰奈公酷暴夫人心何太后顧魯呼曰昔我與
太祖愛汝異于諸子諺云偏憐之子不保業難得之婦
不主家我非不欲立汝汝自不能矣和約既定趨上京
會有告魯呼與太后謀廢立者徙魯呼祖州禁其出入
穆宗時其子喜隱謀反辭連魯呼囚之死獄中年五十
薨玉峯山西谷統和中追謚欽順皇帝重熙二十一年
更謚章肅后曰和敬二子宋王喜隱衛王完

喜隱字完德雄偉善騎射封趙王應歷中謀反事覺以親釋之未幾復反下獄景宗即位聞有赦自去其械而朝帝怒誅守者復置于獄保寧改元乃宥之妻以皇后之姊復爵王宋喜隱輕僇無恒小得志即驕帝嘗召不時至怒而鞭之由是憤怒謀亂貶而復召適見帝與劉繼元書辭意卑遜諫曰本朝於漢為祖書旨如此恐虧國體帝尋改之授西南面招討使命之河東索吐蕃戶稍見進用復誘羣小謀叛帝命械其手足築園土囚祖

州宋降卒二百餘人欲劫立喜隱以城堅不得入立其子
留禮壽上京留守楚寶勒擒之留禮壽伏誅賜喜隱死
雅勒呼字達年性沉默善騎射天顯三年救耶律刷于
定州為李嗣源所獲石晉立始得還為特哩袞薨子敵
烈南府宰相實迪北院大王

太宗五子靖安皇后生穆宗次雅斯哈宮人蕭氏生天
德次迪里次必舒

雅斯哈會同初封太平王世宗立詔許與晉主往還以

昆弟禮穆宗委以國政應歷三年與魯呼子完謀亂會
司天魏璘卜日事覺貶戍西北邊景宗即位亡入沙陀
召還釋其罪封齊王保寧四年薨贈皇太叔謚欽靖

天德字必繼猛悍趨捷人望而畏之太宗討石重貴至
望都晉將杜重威率兵十萬先據河梁上募能斷糧道
者天德請以五千騎行從間道擊走衛送之軍火其輜
重重威窮蹙乃降會同三年與邠用和使晉世宗即位
遣天德護太宗梓宮赴上京太后遣魯呼拒世宗遇于

秦德泉戰甚力敗之太后不悅後不復用天祿二年與蕭翰瑠格等謀反繫獄伏誅

迪里字博斯濟多力善射應歷八年與宣徽使耶律哈斯謀反釋之保寧初封冀王宋人侵漢與南府宰相耶律刷往援却敵而還乾亨元年復與宋人戰于白馬嶺先鋒渡澗未半宋軍迎擊師潰沒于陳子幹格并死焉必舒穆宗時族人和特及蕭卓琳有罪欲亡必舒密以聞帝以為忠常命侍從帝輕殺左右會欲誅監鹿官必

舒諫而免保寧初封越王

按皇子表作穆宗時封考穆宗紀不載景宗紀保寧元年

實始封越

王今據改 討党項有功後以疾薨

世宗三子懷節皇后生和爾鄂博

按皇子表原注云舊文皇族傳書在第三

且云未詳所出按景宗紀云景宗皇帝世宗第二子又舊史本傳云景宗立親祭于薨迎冊為太子當是世宗嫡長子也

景宗妃甄氏生扎木

今從之

和爾鄂博蚤薨景宗立追冊為皇太子謚莊聖恭號太

子院

扎木字呼喇濟敏給好學通契丹漢字能詩嘗與宮人

私通穆宗怒榜掠繫獄景宗立釋之封為寧王保寧八年妻造姦毒奪爵貶烏爾古部賦放鶴詩徵還統和初皇太后稱制命賦芍藥詩詔復舊爵

景宗四子長聖宗次隆慶次隆祐皆睿智皇后生次藥師努未詳所出

隆慶字燕隱小字普賢努八歲封恒王兼侍中統和中拜南京留守徙梁王十七年南征為先鋒至瀛州遇宋將范廷召列陣以待隆慶遣蕭柳擊敗之十九年復敗

宋人于行唐開泰初加守太師兼政事令更封晉國王
尋拜大元帥南京留守賜金券進封秦晉國王五年入

覲帝親出迎勞因同獵于松山還至北安州薨追贈皇

太弟子扎喀魏國王

按契丹國志云扎喀名宗懿少有氣局幹量過人聖宗時封中山王

改封晉王所載頗詳其封國之號亦與此異

蘇克幽王釋嘉努陳王埒富遼

西郡王蘇色漆水郡王

隆祐

通考作隆裕

小字果勒齊一字和多沁乾亨初封鄭王

統和中伐宋留守京師二十一年拜西南面招討使徙

王吳及征高麗復為留守權知北院樞密使事出守東京更王楚開泰初改王齊堯贈太師謚仁孝重熙間改謚孝靖子呼圖克封周王臨海軍節度使合祿封魏王塔卜陳王西京留守後為重元所脅削爵流鎮州

聖宗六子欽哀皇后生興宗及重元次布古德未詳所出普爾氏生吳格次格爾姜氏生侯古

重元見逆臣傳

布古德字薩蘭聖宗第三子明敏善射太平七年遙領

彰信軍節度使為王子即君班詳袞重熙中累遷契丹
行宮都部署封柳城郡王討夏國督戰有功軍還薨
博諾字和多沁特哩袞尼嚕古之孫景宗時為烏爾古
部詳袞政尚嚴急民苦之有司以聞詔曰博諾任方面
寄以細故究問恐損威望尋遷馬羣太保統和十六年
奏核燕軍之不任事者汰之二十八年駕征高麗博諾
為先鋒至銅州高麗將康肇分兵為三以抗遼軍博諾
率耶律鴻果擊破三水營擒肇李玄蘊等軍望風潰會

大軍至斬三萬餘級追至開京破敵於西嶺高麗王詢遁去博諾入開京焚其王宮撫慰其民人以功遷北院

大王薨

本傳舊在列傳第十八卷今移附于此

吳格字洪隱開泰二年為特哩袞出為南京留守薨封燕王

格爾字圖勒琿太平元年為南府宰相薨

海古勒字額勒本重熙初為王子郎君班詳袞七年封饒樂郡王咸雍中徙混同郡王為上京留守薨

興宗三子長道宗次和囉噶次阿林皆仁懿皇后生

和囉噶字阿尼雅興宗第二子與阿林皆道宗同母弟重

熙十七年封越王清寧初徙魯王拜上京留守改南京

加宋魏國王乾統初以為天下兵馬大元帥加守太師

免拜不名三年冊為皇太叔加號曰義和仁壽六年兼

特哩袞復守南京重元亂夜赴戰初天祚立未幾詔弛

圍場之禁和囉噶奏曰天子以巡狩為大事雖居諒陰

不可廢也帝于是復命有司促備春水之行十年從獵

慶州薨子實篤漆水郡王次遠匡義軍節度使次淳

按太

宗世宗景宗聖宗興宗諸子原史無傳今並依皇子表增輯唯穆宗之子表亦不載闕之

淳小字聶埒自幼太后鞠育之既長好文學昭懷太子廢后欲立為嗣帝怒耶律拜薩已知與淳善出淳為彰聖軍節度使天祚即位封鄭王乾統二年加越王六年

拜南府宰相首議制兩府禮儀徙王魏其父和囉嚙薨襲守南京天慶五年東征都監章努濟鴨子河與淳子阿薩爾等三百餘人亡歸先遣迪里等以廢立之謀報

淳淳斬迪里首以獻進封秦晉國王拜都元帥賜金券
許自擇將士乃募燕雲精兵東至錦州隊長武朝彥作
亂劫淳淳匿而免收朝彥誅之會金兵至聚兵戰于阿
喇扎圖敗績復收散卒拒之保大二年天祚入夾山奚
王和勒博林牙耶律達實等引唐靈武故事議欲立淳
遂即位百官上號天錫皇帝改保大二年為建福元年
大赦放進士李寶信等一十九人遙降天祚為湘陰王
以燕雲平上京中京遼西六路淳主之沙漠以北南北

路兩都招討府諸蕃部族仍隸天祚自此遼國分矣封
其妻普賢女為德妃以和勃博知北院樞密使事軍旅
之事悉委達實又遣使報宋免歲幣結好宋人發兵問
罪擊敗之尋遣使奉表于金乞為附庸事未決淳病死

年六十百官偽謚曰孝章皇帝廟號宣宗

按三朝北盟會編云淳守

燕十二年得人心號燕王又謂九大王又謂車湘大王本傳不載

葬燕西香山永安陵

遺命遙立秦王定以存社稷德妃為皇太后稱制改建
福為德興元年時宋兵來攻李處溫父子懼禍欲挾德

妃納土于宋復欲北遁于金以擁立大功自陳德妃罵
曰誤秦晉國王者皆汝父子何功之有悉數其過惡數
十賜死金兵入居庸關德妃奔天德軍天祚誅之降溥
庶人除其屬籍

按本傳及天祚子雅里傳舊
附天祚紀末今改歸宗室

阿林字額勒本重熙十七年封許王清寧中徙陳王秦
王出為遼興軍節度使進封秦越國咸雍間歷西京上
京留守從車駕秋獵薨追封秦魏國王諡欽正

道宗一子濬宣懿皇后生

順宗名濬小字伊囉幹幼而能言好學知書道宗嘗曰
此子聰慧殆天授歟六歲封梁王明年從帝獵遇十鹿
射獲其九帝喜設宴八歲立為皇太子太康元年兼領
北南樞密院事及母后被害太子有憂色耶律伊蘇為
北院樞密使不自安副點檢蕭實沙謂伊蘇曰臣民心
屬太子一日若立吾輩措身何地迺與同知北院宣徽
事蕭特爾格謀構陷太子陰令護尉太保扎拉誣告都
宮使薩喇知院蘇色護衛蕭和克謀廢立詔案無迹不

治伊蘇復令牌印郎君蕭額都溫等言扎拉前告非妄
臣實與謀若不言恐事發連坐帝信之幽太子於別室
以雅克鞠案太子具陳枉狀曰吾為儲副尚何所求公
當為我辨之雅克乃伊蘇之黨易其言為款伏帝大怒
廢太子為庶人將出曰我何罪至是實沙叱登車遣衛
士聞其扉徙於上京囚圍堵中伊蘇尋遣達噶薩巴
往害之太子年方二十上京留守蕭達德以疾薨聞帝
哀之命有司葬龍門山欲召其妃伊蘇陰遣人殺之後

知其冤悔恨無及謚曰昭懷太子以天子禮改葬玉峯
山乾統初追尊大孝順聖皇帝廟號順宗妃蕭氏貞順
皇后一子延禧即天祚皇帝

天祚六子文妃生額魯溫元妃生雅里次塔魯次實訥
埒次定次寧未詳所出

晉王小字額魯溫甫髻亂馳馬善射出為大丞相耶律
隆運後封晉王樂道人善而矜人不能時宮中見讀書
者輒斥去額魯溫嘗入寢殿見實達爾扎拉閱書因取

觀會諸王至陰袖而歸之曰勿令他人見也一時號稱長者及長積有人望內外歸心保大元年南軍都統耶律伊都與其母文妃密謀立之事覺伊都降金文妃伏誅額魯溫不與謀免二年耶律薩巴等復謀立不克帝知額魯溫得人心不忍加誅令縊殺之或勸之亡額魯溫曰安忍為叢爾之軀而失臣子之大節就死聞者傷之

雅里字薩蘭七歲封梁王欲立為皇太子別置禁衛保大三年金師圍青塚雅里在軍中太保特默格扶之出

走間道至陰山聞天祚趨雲內趨赴行在時扈從者千
餘人多于天祚天祚慮特黙格生變欲誅之責以不能
全救諸王仗劍召雅里問曰特黙格教汝何為雅里對
曰無他言通釋之天祚渡河奔夏隊帥耶律迪里劫雅
里北走至沙嶺見蛇橫道而過識者以為不祥後三日
羣僚共立雅里為主遂即位改元神厯雅里性寬大惡
誅殺獲亡者答之而已有自歸者即官之因謂左右欲
附來歸不附則去何須威逼每取唐貞觀政要及林牙

資忠所作治國詩令侍從讀之烏爾古節度使吉勒展
迪里部都統托卜嘉都監圖魯卜各率衆來附自是諸
部繼至而雅里日漸荒怠好擊鞠特默格切諫乃不復出
以耶律迪里為樞密使特默格副之從行人有疲困者
輒賑給之直長保德諫曰今國家空虛賜賚若此將何
以給雅里怒曰若無諸部我將何取不納初令羣牧運
鹽漕倉粟而民盜之議籍以償雅里乃自為直每粟一
車償一羊三車一牛五車一馬八車一駝左右曰今一

羊易粟二斗且不可得乃償一車雅里曰民有則我有
若令盡償民何堪後獵扎拉山一日而射黃羊四十狼
二十一因致疾卒年三十

塔魯封燕國王蚤薨

實訥埒封趙王

定封秦王

寧封許王俱為金師所獲

欽定續通志卷一百九十二

欽定四庫全書

欽定續通志卷一百九十三

宗室傳

金一

始祖以下宗室諸子

呼實默

和卓

布呼福壽

實圖美

實寶思敬

忠

薩布

珠嚕

呼實哈

宗賢

達蘭

卞

膏

夾

愛實

托克索

實圖美

承裕

額爾克

薩哈連

哈昭

羅索三

始祖兄弟三人兄阿庫納之後為呼實默和卓弟博和
哩之後為實圖美都古訥

呼實默哈斯罕人父托卜嘉事遼為太尉呼實默善漢
語通契丹大小字勇而善戰高永昌據東京招哈斯罕

人呼寶默召其族人謀曰吾遠祖兄弟三人同出高麗
大聖皇帝之祖入女真吾祖留高麗自高麗歸於遼吾
與皇帝皆三祖之後皇帝受命即大位遼之敗亡有徵
吾豈能為永昌之臣哉於是率其族屬部衆詣薩哈烏
珍降營於托輝山之下永昌攻之呼寶默力戰不能敵
奔于薩哈及攻開州以糧餉給軍後攻保州擊敗遼將
降其士卒以為哈斯罕七部貝勒天輔二年卒贈監門
衛上將軍再贈驃騎衛上將軍子果實嘗從攻顯州領

四穆昆軍破魚梁務功最以其父所管十部為哈斯罕
都貝勒有和卓者亦稱始祖兄苗裔但不知與呼實默
相去幾從耳

和卓哈斯罕必勒哈水人仕遼領辰復二州漢人渤海
子富色克襲父職再遷靜江中正軍節度使子額哩頁
與呼實默同時歸朝屢以糧餉助伐高永昌及高麗新
羅後從宗望伐宋以功遷真定府路安撫使兼曹州防
禦使授必勒哈水世襲明安子布呼識女真契丹漢字

善騎射睿宗聞其才召置麾下從經畧山東河北陝西襲其父明安授昭勇大將軍海陵伐宋以本明安兵從半道與南征萬戶完顏福壽等俱亡歸謁世宗于遼陽世宗即位除同知哈斯罕節度使事刑部侍郎色克為都統布呼副之坐擅署置官吏私用官中財物削兩階解職未浹旬克實鄂倫完顏璋等謀反欲因帝謁山陵舉事鄂倫與布呼親舊與之謀議乃與可喜璋執鄂倫等上變克實不肯以始謀盡首遂并誅之除布呼瀋州

防禦使累遷順天軍節度使致仕卒

福壽哈斯罕人父和卓國初來歸授明安天眷二年福壽襲父職授定遠大將軍累加金吾衛上將軍海陵省併明安穆昆遂停封正隆末伐宋福壽領羅索塔坦二明安由山東道進至泰安既受甲誘將校北還而高忠建盧萬家努等亦各率衆萬餘俱歸東京欲共立世宗至遼口世宗遣圖克坦思忠府吏張穆喇幹等來迎察其去就思忠見福壽福壽等言正隆失道不能保天下我

輩欲推戴國公爲主爲書以授思忠於是督諸軍渡遼
水徑至東京城下即諭軍士擐甲入衛宮城殺高存福
等明日與諸將及東京吏民從博索路兵馬都總管默
音勸進世宗即位以福壽爲元帥右監軍從默音討白
彥敬赫舍哩志寧于北京是冬世宗聞烏哲庫等與幹
罕戰不利命福壽將兵進討俘獲生口萬計尋赫舍哩
召還授興平軍節度使復其世襲明安尋領濟州路諸
軍事大定三年卒

實圖美扎蘭路完顏部人世為部長父卓巴納始祖弟
博和哩四世孫景祖時使部人密遜來請通宗系景祖
留密遜歲餘善遇之及還以幣帛為贈久之扎蘭歲饑
景祖與之馬牛為助糴費使世祖往致之會世祖有疾
實圖美日夕不離左右世祖疾愈辭歸握手為別約它日
無相忘實圖美體貌魁偉勇敢善戰質直孝友彊記辨
捷臨事果斷世祖襲位交好益深鄰部不悅合兵攻之
實圖美使弟阿索美率二百人南下拒敵敵兵千人出

其東據高泉實圖美將五千人迎擊之敵將阿爾本勇士也出挑戰射中其馬阿爾本反射實圖美中腹實圖美拔箭戰愈力阿索美與勇士七人步戰殺阿爾本諸部兵遂敗因招諭諸部使附於世祖世祖嘉之後伐烏春烏木罕及通恩達薩塔等皆以所部從戰有功弟阿索美尋卒及終喪大會其族太祖率官屬往以伐遼之議訪之後以本部兵從擊高麗及伐遼功尤多太祖西征諸將皆從實圖美率善射者三百人來衛京師時太

宗居守喜其至親出迎勞繼聞黃龍府叛與睿宗討平之師還賞賚良渥尋卒正隆二年封金源郡王子實實思敬

實實康宗時從烏色破高麗軍太祖攻寧江州實實摧鋒力戰授明安後從舍音克中京襲遼主於鴛鴦濼畧定山敗夏將李良輔兵與羅索獲遼帝于伊都谷宗翰伐宋與尼楚赫圍太原明年攻襄垣下潞城降西京至汴元帥府以懷孟北阻太行南瀕河控制險要使實實

統十二明安軍鎮撫之於是殄平寇盜招集流亡四境以安天會四年薨熙宗時贈特進大定間諡威敏世宗思太祖太宗創業艱難求當時羣臣勲業最著者圖像於衍慶宮自遼王舍音而下凡二十一人實實與焉初海陵罷諸路萬戶置蘇伯路節度使世宗時近臣奏請改蘇伯爲扎蘭節度使帝曰蘇伯扎蘭二水相距千里節度使治蘇伯不必改實圖美親管明安子孫襲封者可改爲扎蘭明安以示不忘其初

思敬本名薩哈

原文作希卜蘇弟誤今從刪

初名思恭避顯宗諱改

焉年十一從父謁見太祖詔從獵射黃羊獲之賜以從
馬宗翰伐宋從其兄實實攻太原又從完顏和尼下洛
陽圍汴皆有功師還隸遼王宗幹麾下太宗幸東京溫
湯思敬權護衛押衛卒百人從行領穆昆從征珠格麟
有功遂充護衛天眷二年以捕宗磐宗雋功遷顯武將
軍擢右衛將軍襲扎蘭路萬戶授世襲穆昆七年入爲
工部尚書遷吏部天德初爲報諭宋國使還拜尚書右

丞大定二年封濟國公兼天德軍節度使俄為西北路
招討使唐古布古岱副之將本路兵二千會布古岱視
地形衝要伺契丹賊出沒之地置守禦遠斥候賊至則
戰不以晝夜為限布薩忠義敗斡罕於陷泉詔思敬選
新馬三千備追襲斡罕入於奚中思敬為元帥右都監
以舊領軍入奚地張格宅會大軍討之賊降將碩和卓
與其黨錫勒塔執斡罕并其蘇尼家屬詣思敬降思敬
獻俘於京師拜右副元帥經畧南邊駐山東初明安穆

昆屯田山東各隨所受地主散處州縣世宗不欲明安
穆昆與民戶雜處欲使相聚居之遣戶部郎中完顏讓
往元帥府議之思敬與山東路總管圖克坦克寧議曰
大軍方進伐宋宜以家屬權寓州縣量留軍衆以爲備
禦俟邊事寧息明安穆昆各使聚居則軍民俱便還奏
從之其後遂以明安穆昆自爲保聚其田土與民田犬
牙相入者互易之三年四月召還京師以爲北京留守
七年召爲平章政事先是省併明安穆昆及海陵時無

功授穆昆者皆罷之失職者甚衆思敬請量才用之帝
從其請九年拜樞密使上疏論五事一女真人可依漢
人以文理選試二契丹人可分隸女真明安三鹽滌官
可罷去四與明安同勾當副千戶官亦可罷五親王府
官屬以文資擬注教以女真語言文字皆從之其後女
真人試進士瓜爾佳衡尼瑪哈鑑圖克坦鑑完顏匡輩
皆由此致宰相實思敬啟之也久之帝謂思敬曰朕欲
修熙宗實錄卿嘗爲侍從必能記其事跡對曰熙宗時

內外皆得人風雨時年穀豐盜賊息百姓安此其大概也何必餘事帝大悅世宗喜立事故其微諫如此十三年薨孫烏呼肯扎塔大定二十四年除明威將軍授蘇伯路寶鄰山明安

忠本名都古魯訥字鄂斯歡實圖美之弟太祖器重之將舉兵伐遼而未決也因與都古魯訥計事宗翰宗幹完顏希尹皆從都古魯訥曰以主公英武士衆樂為用遼帝荒於畋獵政令無常易與也太祖然之明年伐遼

都古嚕訥以兵會收國元年與尼楚赫守達嚕噶路二年
與幹魯芬徹會烏楞古討高永昌破其兵東京降遂與
烏楞古等敗耶律鼎呼于蒺藜山天輔二年與羅索俱
入見太祖曰遼主近在中京而敢輒來各杖之太祖駐
軍草灤都古嚕訥取奉聖州破其兵五千于鷄鳴山太
祖入燕京都古嚕訥出德勝口代實圖美為扎蘭路都
貝勒二年

按太祖紀帝伐燕京都古嚕訥出德勝口事在天輔六年本傳類叙于二年之下而此處

復稱二年疑有脫誤

以扎蘭地薄斥鹵遷其部於蘇伯水益以珠

蘇爾之田熙宗即位加太子太師天會十四年加保大軍節度使同中書門下平章事薨天德二年配饗太祖廟庭大定二年追封金源郡王

薩布始祖弟博和哩之後初補親衛軍章宗時選充護衛明昌元年為寧化州刺史累官殿前左副都點檢及平章布薩揆伐宋為右翼都統泰和六年宋將皇甫斌率步騎數萬由碓山窺信分路侵蔡聞郭倬李爽之敗阻溱水不敢進於是揆遣薩布及副統尚慶局使布希

萬努深州刺史完顏達希布等以騎七千往擊之會湊

水漲

按布薩摺傳云撥出額壽至淮宋人拒于水南撲測淮水八疊灘使薩布等潛渡本傳所云湊水恐

是淮水之誤

宋兵扼橋以拒薩布等謀潛師夜出達希布以

騎涉水出其右萬努出其左薩布率精兵直趨橋宋兵

大潰還進爵一級貞祐間知臨洮府事兼陝西路副統

軍改知鳳翔府事兼本路兵都總管俄為元帥右都總

夏人來寇屢擊走之興定初以宋歲幣不至且復侵盜

詔薩布討之破宋人於信陽隴山等處斬獲甚衆尋遣

兵渡淮畧中渡店拔光山羅山定城等縣七月上章言
京都天下之根本竊見城中子城故基宜於農隙築
而新之為國家久長之利及河南陝西州府皆乞量修
從之二年破宋人於鐵山及上石店唐縣奉詔攻棗陽
敗之三年奪宋白石關破宋兵於七口倉又奪宋小鵲
倉復敗宋兵于石鵲崖四年奉詔出兵河北招降晉安
時河北義軍官民堅守堡寨力戰破敵者衆薩布上章
言此類忠亦可嘉若不旌酬無以激人心乞量加官賞

從之遷樞密副使五年奉詔引兵救河東戰屢捷復晉
安平陽元光二年復河中正大元年拜平章政事未幾
轉尚書右丞相三年宣宗廟成將禘祭議配享功臣論
者紛紛薩布為大禮使因言丞相福興死王事齊錦謹
守河南以迎大駕功宜配享議遂定吏部郎中楊居仁
上封事言宰相宜擇人帝語大臣相府非人御史諫官
當言彼吏曹何與左丞延扎舒魯素嫉居仁亦以為僭
薩布徐進曰天下有道庶人猶得獻言況在郎官使其

言可用則行之不可用不必示臣下也帝是之五年行
尚言省于京兆謂都事商衡曰古來宰相必用文人以
其知為相之道薩布何所知使居此位吾恐他日史官
書之某時以某為相而國乃亡即促衡草表乞致仕平
章政事候摯朴直無蘊藉天興元年兵事急都堂會議
摯以國勢不支因論數事曰只是更無擘劃博索怒曰
平章出此言國家何望耶薩布顧謂博索曰候相言甚
當博索含憤而罷時元兵薄汴博索策後日講和或出

質必首相當行力請薩布領省事謹按通鑑輯覽

御批薩布謂宰相必用文人襲世俗迂腐之說而忘金源蓋臣之本夫金源初起大東爾時豈有文人輔成創業乎況國家有事之日尤當與共安危若止潔身獨善而置國事於不顧與國休戚之謂何然薩布後此尚能殉義以全大節若博索慮議和為質力薦薩布以避患更為小人之尤而不足責矣拜為左丞相尋致仕

哀宗遷歸德起復為右丞相封壽國公扈從以行詔行尚書省事於徐州元帥郭恩密與河北叛將郭野驤輩謀歸國用安薩布病疽重為賊黨所制野驤乃約源州叛將麻琮襲破徐州時蔡已被圍徐州將士以朝命阻

絕且逼元兵議出降薩布弗從投河求死不沒軍士援
出之自縊於州第麻琮乃遣人以州降元子按春正大
中充護衛以事係居許州元兵至許按春開南門以降
詔令押入省問事薩布附奏曰老臣不幸生此賊恨不
手刃之十二月車駕東狩留後二相下開封擒捕斬之
獄中

珠嚕宗室子從鄭王烏色敗高麗於海蘭取雅魯城克
寧江州收黃龍府珠赫店達嚕噶城呼岱巴岡諸役皆

力戰有功東京降為本路招安副使敗遼兵破通古營
蘇州漢民叛走珠嚕追復之以功為穆昆天輔四年卒
皇統中贈鎮國上將軍

呼實哈宗室子從太祖攻寧江敗遼兵于達嚕噶城破
遼主親兵皆有功遼軍來援濟州呼實哈與其兄實古
納以兵迎擊敗之還攻濟州中流矢戰益力克其城從
攻春泰州降之并降境內諸部族其不降者皆攻拔之
遼主西走呼實哈追至中京獲其宮人輜重凡八百兩

德州復叛呼寶哈以兵五千克其城從羅索擊敗敵兵於歸化降其城從取居庸關并燕之屬縣及其山谷諸屯伊寶部既降復叛呼寶哈引兵追及戰敗之俘獲甚衆澤州諸部有逃者皆追復之又敗叛人於臨潢誅其酋領而安撫其人民天眷二年遷永定軍節度使改武定軍徙汴京留守天德三年授世襲明安卒

宗賢本名阿魯太祖伐遼從攻寧江州臨潢府太宗監國選侍左右甚見親信臨潢復叛從宗望復取之遷歸

德軍節度使政寬簡境內大治秩滿士民相率詣朝廷
請留及改武定軍百姓扶老攜幼送數十里悲號而去
改永定軍東德廉訪官吏士民持盆水與鏡前拜言曰
使君廉明清直類此民實賴之用是超遷兩階天德初
授世襲穆昆駝驛召之雄州父老相率張青繩懸明鏡
於公署老幼填門三日乃得去封定國公再除忠順軍
節度使捕盜司執數人至府宗賢閱其案謂僚佐曰吾
察此輩必冤不數日賊果得人服其明改海蘭路兵馬

都總管封廣平郡王崇義軍節度使兼領北京宗室事
正隆例奪王爵加金紫光祿大夫改臨海軍大定初遣
使召之宗賢率諸宗室見於遼陽除同簽大宗正事封
景國公致仕起為博索路兵馬都總管復致仕卒

達蘭宗室子年十六事太祖未嘗去左右出河店之役
太祖欲親戰達蘭控其馬而止之曰主君何為輕敵臣
請效力即挺槍手殺七人已而槍折騎士曳而下者九
人太祖壯之曰誠得此輩數十雖萬衆不能當也及戰

于達嚙噶城遼兵陣于營外太祖遣達蘭往擊之衝出敵陣大敗其衆攻臨潢府春泰州中西二京皆有功天輔六年授穆昆天會四年從伐宋屢以功受賞明年再舉至汴宗望聞宋人會諸路援兵于睢陽遣達蘭與阿里庫將兵二千往拒之敗其前鋒軍于杞縣又破三寨擒宋京東路都總管胡直孺南路都統制隋師元及其三將并直孺二子遂取拱州降寧陵復破宋兵於睢陽進取亳州聞宋兵十萬且至會宗望益兵四千合擊大

敗之擒其將石瑱而還

按本傳自達蘭與阿里庫將兵以下敘行與穆宗子達蘭傳人

同事同文同未知究當誰屬也姑兩存之

帥府嘉其功賞賚優渥睿宗駐兵

熙州分遣諸將畧地達蘭以軍五百入六盤山十六寨降其官民皇統中累加銀青光祿大夫天德初加特進授世襲明安卒

卞本名鄂摩上京司屬司人大定二年收充護衛積勞授彰化軍節度副使入為都水監丞累遷中都西京路提刑使徙知歸德府河平軍節度使導河有勞除北京

留守未幾改知大興府事時有言瓜爾佳衛在軍不法
詔刑部問狀事下大興府卞輒令追攝帝以爲失體杖
四十久之乞致仕不許拜御史大夫先是司諫言御史
大夫久闕憲紀不振宜選剛正疾惡之人肅清庶務上
由是用卞既而以金吾衛上將軍致仕卒

膏本名額哩埒隸上京司屬司大定十年以皇家近親
收充東宮護衛授御院通進從世宗幸上京會皇太子
守國薨特命與滕王府長史臺馳驛往護喪時章宗爲

金源郡王亦留中都且命膏等保護世宗還都遷符寶郎除吏部郎中章宗即位坐與唐古貢爲壽犯夜禁奪官一階罷明昌元年起爲同知棣州防禦使事坐譏訕宰輔杖罷之明年降授同知宣德州事召授武衛軍副都指揮使四遷知大興府事轉左右宣徽使承安二年拜尚書右丞出爲泰定軍節度使移知濟南府卒

奕本名三寶隸默音賽音司屬司大定七年以近親充東宮護衛十人長轉尚廩局使章宗即位遷左衛副將

軍累遷右副都點檢兼提點尚廐局使諭旨曰汝非有過人才第以久次遷授當謹乃職未幾生廐馬瘦決三十承安二年改左司都點檢兼職如舊俄授同簽大睦親府事卒奕為人貪鄙數以職敗帝愛其能治園塲故進而委信之

愛實宗室子好學問襲父北京路苦柏山明安聽訟明決人信而愛之察廉能除彰國軍節度副使改上京留守判官提刑司奏彰國軍治狀遷同知速頻路節度事

改歸德軍歷海邳二州刺史皆兼總押軍馬宋統領劉
文謙以兵犯宿遷迎擊破之復破戚春夏興國舟兵萬
餘人斬夏興國于陣遷鎮國上將軍為赫哩執中前前
鋒渡淮破寶應天長二縣師還遷同知歸德府事改泗
州防禦使大安二年改華州防禦使遷鎮南軍節度使
累遷河南統軍使兼昌武軍節度使卒

托克索宗室子納罕塞人初隸萬戶賈嘉努麾下嘗領
偏師破雲中諸山寇盜宗望攻平州遣托克索討應州

賊平之撫安其民而還及伐宋在宗翰軍以八穆昆破石嶺關屯兵數萬祁縣降而復叛托克索攻下之進取文水縣後從諸帥列屯汾州之境宋河東軍帥郝仲連張思正陝西軍帥張闕索及其統制馬忠合兵數萬來援皆敗之宗翰南伐至潞還太原猶未下即留尼楚赫總督諸軍於是宋援兵大至托克索從瑪武烏嚕破宋兵四千于文水宋將黃迪等以兵三十萬柵于縣之西山復與耿守忠合兵九千擊之獲馬及資糧甚衆宋制

置使姚古率兵至隆州谷托克索與巴爾斯以步騎萬餘
禦之种師中兵十萬據榆次尼楚赫使托克索與和尼
等合兵八千擊敗之斬師中宋將張灝以兵十萬營于
文水近郊復與巴爾斯擊破之潞州復叛宋兵號十七
萬固納托克索巴爾斯皆被圍托克索麾軍士下馬力
戰遂潰圍而出及再舉伐宋宗翰命羅索率軍先趨汴
羅索至澤州托克索烏嚕以五百騎為前驅往招河陽
先據黃河津宋兵萬餘背水陣進擊敗之遂降河陽汴

京平諸將西趣陝津畧定河東郡縣托克索取憲州遇其援軍擊敗之貝勒寧溫珠魯等攻保德未下托克索進兵助擊梯衝竝進遂克其城貝勒舍哩執中石州屢敗亡其三將軍士歿者數百人托克索令諸軍去馬力戰盡殪之天會六年宗輔駐師鄧州托克索瑪武巴爾斯西取均房下其城遂克唐蔡陳州及潁昌府天眷初除彰德軍節度使三年為元帥左監軍皇統八年改濟南尹天德間封定國公授世襲千戶卒正隆二年贈應

國公

實圖美本宗室和索哩改子也年十五事太宗為左奉宸皇統二年充護衛除武器署丞累官肇州防禦使大定初除元帥左都監與咸平尹烏哲庫率泰州兵及海蘭路兵千五百人會臨潢尹伊蘇瑪勒討契丹契丹犯臨潢伊蘇瑪勒死攻之不能克迺引衆東行實圖美表乞濟師會左副元帥默音以大軍至實圖美改哈斯罕節度使隸右翼與赫舍哩志寧敗賊於長濼戰霜霧河

皆有功改博索路兵馬都總管卒

承裕本名和碩以宗室子克符寶祗候除中都左警巡副使通括戶籍百姓稱其平累遷東北路招討副使以病免起為西南招討副使泰和六年伐宋遷陝西路統軍副使俄改通遠軍節度使陝西兵馬都統副使與秦州防禦使完顏璘屯成紀界宋吳玠兵五萬由保畝姑蘇等谷襲秦州承裕璘以騎兵千餘人擊走之追奔四十里凡六戰宋兵大敗斬首四千餘級宋吳玠使其將馮興

楊雄李珪以步騎八千入赤谷承裕璘及河州防禦使
富察秉鉉逆擊破之宋步兵保西山騎兵走赤谷承裕
遣部將唐古安塔哈率騎二百馳擊宋步兵宋步
兵大潰追奔至兒郊城斬二千餘級明安巴怙努追宋
騎兵殺千餘人斬楊雄李珪于陣馮興僅以身免承裕
進兵克成州八年罷兵遷河南東路統軍使兼知歸德
府事俄改知臨潢府事大安初召為御史中丞三年拜
參知政事與平章政事通吉思忠行省戍遼烏沙堡之

敗朝廷獨坐思忠詔承裕主兵事八月元兵至野狐嶺
承裕喪氣不敢拒戰退至宣平縣中土豪請以土兵為
前鋒以行省兵為聲援承裕畏怯不敢用但問此去宣
德間道而已其夜承裕率兵南行元兵踵擊之明日至

會河川

衛紹王紀
作會河堡

兵大潰承裕脫身走入宣德元游兵

入居庸關中都戒嚴識者謂金之亡決於是役衛紹王
薄其罪除名而已崇慶元年起為陝西安撫使至寧元
年遷元帥右監軍兼咸平府路兵馬都總管與契丹將

克戰敗績改同判大睦親府事遼東宣撫使貞祐初改
臨海軍節度使卒

額爾克內族也時有兩額爾克皆護衛出身一曰草火
額爾克每得賊好以草火燎之一曰板子額爾克嘗詆
以官中牙牌報班齊者為板子故時人各以是目之正
大八年九月大兵攻河中以內族兩額爾克將兵三萬
守之初元兵期以明年正月合南北軍攻汴梁故自將
攻河中河中告急哈達布哈遣王敢率步兵一萬救之

十二月河中破初河中主將知元兵將至懼軍力不足截
故城之半守之及被攻行帳命築松樓高二百尺下瞰
城中土山地穴百道竝進至十一月攻愈急王敢救軍
至軍士殊死鬪日夜不休西北樓櫓俱盡白戰又半月
力盡乃陷草頭爾克被擒尋殺之板額爾克提敗卒三
千奪船走北兵追及鼓噪北岸上矢石如雨數里之外
有戰船橫截之敗軍不得過有賣火砲名震天雷者連
發之砲火明見船軍無幾人力斫橫船開得至潼關遂

入閔鄉尋有詔責額爾克不能死車載入陝州決杖而死
識者謂河中城守力竭而陷非戰之罪故額爾克之
死人或寃之初額爾克奉詔於邠涇鳳翔往來防秋其
族孫奉御努爾監戰額爾克勳為所制意頗不平漸生
猜隙七年召赴京師時努爾同赴召譖額爾克畏怯帝
意頗罪額爾克及河中陷苦戰力盡而元兵百倍臨之
人謂雖至不守猶可以自贖竟杖而死

薩哈連字安之內族也宣宗朝累遷同簽樞密院事元

光二年十二月宣宗病篤英王翬圖先入侍哀宗後至
勒兵東華門薩哈連解都點檢和卓佩之從哀宗入由

是見親信正大元年以薩哈連同判大睦親府事兼前
職四年元既滅西夏進軍陝西四月丙申召薩哈連等
同議西事羣臣多主和獨薩哈連力破和議八月朝廷
得清水之報令有司罷防城及修城丁壯凡軍需祖調
不急者權停帝謂之曰朝臣或欲我一戰汝獨言當靜
以待之與朕意合今日有太平之望皆汝謀也未幾李

大節規言薩哈連諂佞納賄及不公事奏帖留中不報
明惠皇后傳旨戒曰汝諂事帝之騎鞠皆汝所教亦極
言之帝頗悟出為中京留守九年元兵至洛洛中初無
軍得三峯潰卒三四千與忠孝軍百餘人守禦時薩哈
連疽發於背不能軍三月忠孝軍百餘騎入使宅強擁
之出奔薩哈連不得已從之出南裏城門城上軍覺閉
之甕城中矢石亂下薩哈連仰呼求救軍士知出奔非
意以繩引而上送入其宅不敢出丙戌夜城破薩哈連

奪南門出不得投濠水死

哈昭一名永錫貞祐中為元帥左監軍失援中都宣宗
削除官爵杖之八十已而復用四年以御史大夫權尚
書右丞總兵陝西留沔池數日進及京兆元兵已至合
周竟不出戰遂失潼關有司以敵至不出兵當斬諸皇
族百餘人上章救之遂再奪爵免死除名久之起為參
知政事性好作詩詞語鄙俚自草括粟榜文有雀無翅
兒不飛蛇無頭兒不行等語京城目之曰雀兒參政哀

宗用而不悟卒致敗事

羅索三人皆內族時以其名同故各以長幼別之正大
八年慶善努棄京兆適鷹揚都尉大羅索運軍器至白
鹿原遇元兵與戰兵刃既盡以絛繫掉金牌力戰而死
九年正月元兵至襄城元帥中羅索小羅索遇於汝墳
羅索以正旦飲將校皆醉不能軍遂敗退走許州天興
二年正月河朔軍潰哀宗走歸德中羅索為北面總帥
小羅索左翼元帥收潰卒及將軍瓜爾佳玖實奔蔡州

蔡帥烏庫哩栲栳知其跋扈不納遂走息州息帥舒穆魯玖珠納之時白華以帝命送虎符於玖珠為息州行帥府事玖珠出近侍好自標致驕從盈路三人者妬之漸生猜貳因誣玖珠反使人鎖之以瓜爾佳玖實為帥兼權息州六月赦至蔡蔡帥栲栳懼玖珠為三帥所誅馳送詔書於息乃得免及帝將幸蔡蔡密召中羅索引兵來迓羅索遲疑久之乃奉迎七月召玖珠至與中羅索辨於帝前時中羅索已授同簽樞密院事不欲使之終

訟乃罷玖珠帥職既而覘知宋人有窺息意息帥懼奏請益兵為備朝廷以參知政事穆延烏登行省事於息州中羅索以同簽樞密院事為總帥小羅索以副點檢為元帥王進為彈壓帥瓜爾佳玖實為都尉以忠孝馬軍二百步軍五百屬之烏登赴息夜遣忠孝軍百餘騎襲宋營於中渡宋人望之駭愕奔潰斬獲甚衆復奏元帥張閏不遵約束乞正典刑羅索表閏無罪帝遣人赦之比至已死獄中閏為羅索腹心玖珠之獄皆閏發之

烏登廉得其事因失律誅之十一月宋軍二萬來攻城

中食盡乃和糴既而括之并括金帛衣物城中皆無聊

而行省及諸帥日以歌酒為事聲樂不絕下及軍士強

娶寡婦幼女無所不至

按大金國志載天興二年十二月權叅政羅索選稍銳啣枚夜出

人荷束藁將燒敵營元軍覺於隱處伏強挽弩殺傷甚衆羅索中口流血昏憤翌日乃蘇未知其為中羅索歟

小羅索歟本傳失載附錄於此

三年正月蔡凶問至諸帥殺之以滅口

數日蔡信聞然諸帥屏人聚議乃使送款於宋遂發喪

設祭謚哀宗曰昭宗舉城南遷宋人焚州樓櫓州老幼

渡淮元兵追及之無有免者且誅索行省以下官屬於
宋宋人令官屬入城託以犒賞從萬戶以上六七百人
皆殺之既而與元軍接南軍斂避一軍悉為所殺